



INSTRUCCIÓN DA DIRECCIÓN XERAL DE CENTROS E RECURSOS HUMANOS SOBRE O PROCESO DE ADMISIÓN DO ALUMNADO PARA O CURSO ACADÉMICO 2011-2012.

Por Decreto 30/2007, do 15 de marzo, DOG do 16, régúlese a admisión do alumnado en centros docentes sostidos con fondos públicos que imparten as ensinanzas reguladas na Lei orgánica 2/2006, do 3 de maio, de educación, e por Orde do 17 de marzo de 2007, DOG do 19 (corrección de erros no DOG do 4 de abril), régúlese o procedemento para a admisión do alumnado no segundo ciclo da educación infantil, educación primaria, educación secundaria obrigatoria e bacharelato en centros docentes sostidos con fondos públicos.

A sentenza 1296/2010, do 17 de novembro, do Tribunal Superior de Xustiza de Galicia, declara a nulidade de pleno dereito do artigo 9.2 do antedito Decreto, así como a inaplicación dalgúns outros preceptos da mesma norma a centros privados concertados. En coherencia xurídica con ela, por sentenza 1477/2010, do 22 de decembro, do Tribunal Superior de Xustiza de Galicia, declárase a nulidade de pleno dereito e a inaplicabilidade de diversos preceptos da orde que desenvolve o decreto.

Co obxectivo de facilitar o proceso de admisión en centros docentes públicos e privados concertados da nosa Comunidade para o curso académico 2011/2012, en tanto non se proceda á adaptación da normativa ás referidas sentenzas, esta Dirección Xeral dita as seguintes,

INSTRUCCIÓNS:


Primeira.- O prazo de presentación de solicitudes de admisión abrangue dende o 1 de marzo ata o 31 de marzo de 2011, ámbolos dous inclusive.

Segunda.1.- A solicitude, axustada ao modelo oficial, anexo II da Orde do 17 de marzo, será única e se presentará no centro que se solicita en primeiro lugar, sen prexuízo para os centros públicos, do establecido no artigo 38.4 da Lei 30/1992, do 26 de novembro, de réxime xurídico das Administracións Públicas e do procedemento administrativo común.

2. Deberá ter rexistro de entrada e, se é o caso, de saída, que acrediten a súa recepción e remisión, en todos os centros educativos, públicos e privados concertados.

3. No suposto de que se presente máis dunha solicitude para unha mesma ensinanza no mesmo ou diferentes centros, a orde de prelación determinarase atendendo á/s data/as de rexistro de entrada no/s centro/s.

Se non fose posible establecer a orde de preferencia conforme ó parágrafo anterior, requirirase ó interesado para que a sinala no prazo urxente de 5 días. De





non facelo, terase en conta a solicitude que conste rexistrada en primeiro lugar na base de datos desta consellería.

Terceira.- De conformidade co previsto nos apartados 5 e 6 do artigo 26 do Decreto 30/2007, do 15 de marzo, e no artigo 15.2 da Orde do 17 de marzo de 2007, as direccións dos centros públicos e os/as titulares dos centros privados concertados porán ao dispor da Administración educativa tres postos escolares por unidade para a escolarización do alumnado con necesidades específicas de apoio educativo, nos seguintes cursos:

- 1º curso do segundo ciclo da educación infantil.
- 1º curso de educación primaria.
- 1º curso da educación secundaria obrigatoria.

Cuarta.1. Na solicitude de admisión, na columna "Puntuación" (folla 2 do Anexo II), os/as solicitantes deben cubrir os datos numéricos realizando unha autobaremación.

2. As directoras e os directores dos centros docentes públicos ou as persoas titulares dos centros privados concertados, con máis demanda que oferta de prazas escolares, entregarán copia das solicitudes para os cursos nos que se produce esta circunstancia, no prazo de 48 horas dende o remate do prazo de presentación, na Xefatura Territorial da Consellería de Educación e Ordenación Universitaria correspondente, coa finalidade de que verifique que os datos alegados polos interesados, relativos á renda e ao domicilio familiar, coinciden cos emitidos pola Axencia Estatal de Administración Tributaria.

A Xefatura Territorial remitirá aos centros, con anterioridade á celebración dos respectivos consellos escolares, os resultados da verificación do domicilio fiscal e da renda da unidade familiar.

3. Os consellos escolares dos centros públicos e os/as titulares dos centros privados concertados, responsables da baremación e do proceso de admisión, comprobarán a documentación acreditativa dos criterios alegados, revisarán as puntuacións declaradas polo solicitante e procederán a ratificar ou rectificar as puntuacións parciais e total e, se é o caso, a solicitar a documentación complementaria prevista no artigo 21.4 da Orde do 17 de marzo de 2007.

4. Se o alumno ou alumna non obtivese praza no centro privado concertado solicitado o/a titular do centro achegará a solicitude, xunto coa correspondente documentación, ao Servizo Territorial de Inspección Educativa, co obxecto de que se proceda á súa escolarización.

5. As solicitudes presentadas fóra do prazo de admisión, adxudicaranse por proposta motivada do centro docente, logo do informe favorable do inspector ou inspectora que lle corresponda.





Quinta.1.- Considerarase como domicilio familiar o habitual de residencia dos representantes legais do alumnado ou, se é o caso, o das alumnas e alumnos maiores emancipados se viven e domicilios distintos daqueles.

2. Cando os representantes legais vivan en domicilios diferentes considerarse como domicilio familiar o daquel con quen conviva ou teña a garda e custodia legalmente atribuída.

3. De conformidade co establecido no artigo 21.4 da Orde, o domicilio familiar acreditarase mediante "certificado de empadramento municipal", verificado conforme se sinala na instrución cuarta.2.

4.- Excepcionalmente, pode considerarse como domicilio familiar o daqueles familiares cos que o menor efectivamente conviva. Nestes supostos excepcionais non é suficiente a xustificación do domicilio mediante unha certificación do padrón municipal, sendo requisito imprescindible para a súa consideración a xustificación dunha convivencia real mediante certificación específica expedida, para tal efecto, polo concello, a partires de informes da Policía Local ou da Garda Civil, agás no caso de menores en situación de acollemento, no que as familias de acollida presentarán unha fotocopia da resolución ditada pola Xefatura Territorial da Consellería de Traballo e Benestar.

Sexta.1.- De conformidade co artigo 22.5 da Orde do 17 de marzo de 2007, para a valoración da renda da unidade familiar, as persoas interesadas deberán facer constar a cantidade correspondente á base imponible no caso de declaración conxunta ou á base imponible de cada un dos declarantes da unidade familiar no caso de declaración individual. A tal efecto, constará a cantidade que resulta da suma das casiñas 455 (base imponible xeral) e 465 (base imponible do aforro) da correspondente declaración do imposto sobre a renda das persoas físicas do ano 2009.

2.- Para a aplicación da puntuación deste criterio, previsto no artigo 30 da Orde, utilizarase o Indicador público de renda de efectos múltiples (IPREM) correspondente ao ano 2009, que está cifrado en 6.326,86 € anuais, con exclusión das pagas extraordinarias (Lei 2/2008, do 23 de decembro, BOE do 24).

Sétima.- Conforme co establecido no artigo 16.4 do Decreto 30/2007, os centros públicos adscritos a outros centros públicos, que impartan etapas diferentes, consideraranse centros únicos para os efectos de aplicación dos criterios de admisión. Isto non implica que cando dous ou máis CEIP estean adscritos a un mesmo IES, todos os centros de educación infantil e primaria deban ter a mesma área de influencia.

Oitava.1- De conformidade coa sentenza do Tribunal Superior de Xustiza de Galicia, 01296/2010, do 17 de novembro de 2010, o artigo 9.2 do Decreto 30/2007, declárase nulo de pleno de pleno dereito. En consecuencia asignarase a puntuación de irmás matriculados no centro educativo, con independencia de que o nivel educativo no que cursen os estudos estea concertado ou non.





A mesma sentenza, declara inaplicables aos centros privados concertados os artigos 7.5 e 31.1, letras e), f), g).

2. A sentenza 01477/2010, do TSXG do 22 de decembro de 2010, declara a nulidade do artigo 19.2, co mesmo contido que o do 9.2 do decreto, e a inaplicación aos centros privados concertados dos artigos 8.6, 10.3, 12, 16.a), 37.3 e 4, 44.1.e), f) e g), 45.1, 46.2 e 3.

Novena. Unha vez que o centro realice a baremación das solicitudes, publicará no seu taboleiro de anuncios a relación nominal de todo o alumnado admitido e non admitido por curso, mediante listaxes ordenadas por orde de puntuación.

En aplicación da Lei Orgánica 15/1999, de 13 de decembro, de Protección de Datos de Carácter Persoal, dado que as listaxes poden conter datos que afectan á intimidade persoal ou familiar do alumnado, nelas só constará a puntuación total obtida.

Na secretaría do centro educativo, estarán as listaxes nas que conste a puntuación asignada a cada alumna/o polos distintos criterios establecidos no baremo, segundo o artigo 35.1 do Decreto 30/2007. Estas listaxes poderán ser consultadas polos que teñan a condición de interesados no procedemento, de conformidade co artigo 31 da Lei 30/1992, do 26 de novembro, de réxime xurídico das administracións públicas e do procedemento administrativo común.

Décima. En cumprimento do artigo 34.3 da reiterada Orde, o próximo día 1 de marzo, ás 12 horas, celebrarase na sala de xuntas B da Consellería de Educación e Ordenación Universitaria en Santiago de Compostela, o sorteo público no que se extraerán dúas letras de prioridade do primeiro e segundo apelido, e que resolverá o posible desempate das puntuacións finais.

Santiago de Compostela, 28 de febreiro de 2011

O director xeral de Centros e Recursos Humanos

José Manuel Pinal Rodríguez